

RETIRU BA NATÁL



FOIN-SA'E SIRA

Ita besik ona Natal: kreda oferese mai ita tempu ida, ne'ebé hanaran Adventu, atu bele prepara an ba eventu boot ida ne'e, Jezús ne'ebé hiit An mai! Primeira Leitura iha Missa Natál Kalan fahe rua husi profeta Isaías dehan:

L: Iha loron hirak ne'ebá, povu ne'ebé la'o iha nakukun laran, haree naroman boot ida. ba ema sira ne'ebé tuur iha nakukun laran, naroman boot ida mosu ba sira. Na'i, Ita mak halo nia di'ak sai wa'in, Ita mak halo nia ksollok sai boot.

G: Amo Papa Francisco, tinan kotuk, halo komentariu kona-ba leitura ida ne'e:

L: Leitura ida ne'e ko'alia kona-ba ita-nia rasik nia realidade kle'an: ita mak povu ida ne'ebé la'o daudaun ho nakukun no roman haleu ita (no mós iha ita-nia laran). Kalan Natal nian, maski nakukun "falun" mundu ida ne'e, eventu ne'ebé akontese tinan barak liu ba sei mosu fali: povu ne'ebé la'o iha nakukun laran haree roman boot! Iha ita-nia istória pesoál mós, iha momentu ruma nakukun nian no momentu ruma ho roman. Se ita hadomi Maromak no maluk sira, ita la'o iha roman; se ita taka ita-nia fuan, se foti an, buka ita-nia interese rasik, bosok manán, nakukun sei tama iha ita-nia laran no sei falun mundu tomak.

(momentu ruma nonok)

G: Ohin ita iha oportunidade atu reflète kona-ba ita-nia an, ita-nia hahalok sira; hodi hateke ba "modelu" sira ne'ebé evanjellu propoin iha pasajen Natál nian, ita bele kompara ita-nia moris no avalia oinsá ita hein eventu ida ne'e. Bainhira ema dehan "hein", ita hano in ba buat ruma "pasivu", maibé iha Biblia hein katak "matan moris, neon na'in"; bele uza atu dehan ema ne'ebé nia doben sai ba liur, no nia hein hodi la kole. Ita sei rona evanjellu Lukas nian ne'ebé ko'alia kona-ba Jezús nia moris

L: Lk 2,1-20

Bele propoin reflesaun sira ne'e hodi ko'alia de'it, ka bele fahe foin-sa'e sira ba grupu ruma ho na'in 7/8 iha grupu ida-idak no husu ba sira atu reflète :

- Protagonista na'in hira ita bele hetan iha pasajen ida ne'e?
- Ba protagonista ida-idak koko atu hili ninia karakteristik a ida

Tuir mai ne'e bele hetan reflesaun ruma kona-ba protagonista ida-idak: animadór retiru nian bele hato'o keda ka tulun foin-sa'e sira atu deskobre aspetu sira ne'e.

JOSÉ

José mak ema ne'ebé la ko'alia: iha pasajen ida ne'e no pasajen seluk sira, ita haree katak José mak halo tuir buat ne'ebé Maromak rasik, ka akontesimentu sira hatudu ba nia. Evanjelista Mateus dehan katak nia mak ema loos, justu, iha ne'e, maski nia haree nia ferik oan nia kondisaun, nia hakotu atu halo buat ne'ebé lei husu ba nia, no nia hahú viajen ida, hodi konfia katak Maromak sei halo buat ne'ebé nia promete no sei tau matan ba ninia família. Bainhira bibi atan sira sei to'o fatin iha ne'ebé sira hela, bibi atan sira Maria no José ho Kosok Oan. Keta karik nia sente mós neon sala, tanba nia lori nia feen iha viajen ida ne'e no ikus nian, nia la bele oferese ba Maria fatin di'ak ida atu tuur ahi. Maski nune'e, José la fô sala ba Maromak, la arrepende ba buat ne'ebé nia halo; iha situaun todan, nia kontinua fiar ba Na'i. José iha nafatin, hanesan prezensa nonok, maibé prontu atu hala'o knaar ne'ebé Maromak entrega ba nia.

- ✓ Ita hatene hala'o nafatin ita-nia knaar ho nonok, hodi la buka ema nia respeitu ka estima, maibé hodi haksolok katak ita halo buat ne'ebé Maromak husu mai ita?

- ✓ Dala barak ita gosta katak ema rekoñese buat ne'ebé ita halo, ita-nia valór nu'udar ema, no bele akontese katak se ema la haree no la fó importánsia ba buat ne'ebé ita halo, ita husik de'it! José hanorin mai ita fidelidade ba ita-nia knaar, ba ita-nia prezensa nu'udar sarani, maski susar ka todan.



MARIA

Ita bele hanoin oinsá Maria prepara nia an ba eventu ida ne'e, ita bele imajina domin ne'ebé nia hatudu ba oan ida ne'e no evanjelista tulun ita atu komprende ninia domin hodi dehan katak Kosok Oan sei haneras. Ida ne'e mós sinal ne'ebé anju sira fó ba bibi atan sira: Maria nia domin nia tau matan gia ema atu rekoñese Jezús, ita-nia Maksoin. Iha pasajen ida ne'e Maria la ko'alia, nia la espresa ninia sentimentu sira, maibé evanjelista Lukas dehan katak nia rai hela liafuan hotu hodi hanoin didi'ak. Ita la hatene saida mak Maria hein iha momentu ida ne'e, maibé ita hatene katak, iha Nazaret, anju ko'alia kona ba Maromak nia Oan no karik Maria hein katak Maromak nia Oan ida ne'e sei moris iha honra no glória, ho buat hotu fasíl, maibé husi uluk kedas, Maria tenke komprende katak Maromak nia dalan la hanesan ema ninian!

- ✓ Dala barak, ita hakarak hatene no komprende buat hotu ne'ebé mosu, se lae, ita ko'alia kona-ba destinú no sai pasivu atu hasoru situaun foun ne'ebé ita la hein. Maria hanorin mai ita katak, dala barak, ita presiza la'o iha nakukun laran, hodi la komprende Maromak nia planu iha momentu ka situaun ida, maibé kontinua la'o ba oin hodi reflète, koko atu hakle'an esperiénsia ne'ebé ita enfrenta, liuliu fiar katak Maromak sei hatudu dalan.
- ✓ Bainhira ita hadomi ema ida, ita hakarak hatudu domin ida ne'e: dala ruma, la'ós ho liafuan sira (ne'ebé bele hela iha ibun tutun de'it), maibé ho ita-nia hahalok ita espresa ita-nia sentimentu sira, liuliul ho ita-nia kapasidade atu terus no husik ita-nia planu sira atu favorese ema ne'ebé ita hadomi. No ita-nia domin ba Maromak? Oinsá ita hatudu ba ema seluk katak Maromak nia Liafuan mak importante ba ita, oinsá ita hatudu katak ita sei hadomi kosok Oan ne'e ne'ebé atu moris no Ninia Aman ne'ebé haruka Nia?

BIBI ATAN sira

Bainhira anju mosu ba sira, bibi atan sira sei hala'o daudaun sira-nia serbisu: tau matan ba bibi sira. Iha tempu Liurai sira nian, bibi atan mak modelu liurai nian: ida ne'ebé tau matan, fó han, buka kondisaun di'ak ba ninia bibi sira. Maibé, iha tempu Jezús nian, povu ladún iha respeitu ba bibi atan sira, tanba sira balun na'okteen no ho serbisu ne'ebé sira hala'o sira bele sai baruk, maibé Na'i hili sira. Loos duni, hodi tuir bibi sira iha toos laran, sira besik liu fatin iha ne'ebé Jezús moris duke ema riku sira ne'ebé toba hakmatek iha ninia uma. Maromak hatudu katak nia konfia ba ema no Nia hili sira ne'ebé ema seluk la fó valór. Se ita reflète perigu ka balada sira; atitude “vijilánsia” mak atitude ne'ebé Maromak husu ba sira ne'ebé fiar; no mós, hodi rona anju sira (no karik tanba kuriozu) sira hamriik hodi ba buka “lalais” buat ne'ebé anju sira temi. Nune'e, maski la konsiente, ho sira-nia hahalok bibi atan sira sai modelu kona-ba ema ne'ebé hein Jezús no buka atu hetan Nia.

- ✓ Iha ita-nia moris, Maromak entrega ona knaar ruma: serbisu ka estuda, tau matan ba alin sira ka ba aman-inan sira ne'ebé tinan boot ona. Ha'u hala'o knaar ida ne'e ho responsabilidade, hodi koko atu hatán ba Maromak nia mensajen sira ne'ebé ha'u simu husi moris loron-loron nian?
- ✓ Se ita fó atensaun, ita haree katak anju sira ko'alia kona-ba Maksoin ida, maibé bibi atan sira hetan labarik ida, ne'ebé la iha sinál ida atu hatudu katak nia mak Maksoin (Kosok Oan moris iha fatin kiak, la iha protesau...). Bibi atan sira ba buat ne'ebé sira rona: ha'u hatene fiar ba Maromak, ne'ebé hatudu An iha ha'u-nia moris loron-loron nian, ka ha'u buka nafatin akontesimentu boot ida, ka milagre sira atu hametin ha'u-nia fiar? Ha'u reza, atu, liuhusi orasaun, ha'u bele aprende atu haree Maromak nia prezensa iha mundu no istória? Durante tempu Adventu nian, karik ha'u fó tempu uitoan ba orasaun: oinsá ha'u bele kontinua atu moris hamutuk ho Jezús oras-oras?
- ✓ Iha evanjellu Lukas nian, liuliu kapitulu sira ne'e, ita lee katak “Mari ba lalais hasoru Isabel”, “Bibi atan sira ba lalais haree buat ne'ebé anju sira haklaken”, la kleur, João Baptista sei konvida hebreu sira atu nakfilak an (lalais) tanba tempu to'o ona; ita bele husu ba ita-nia an: ita mós sente “urjénsia” ida ne'e ba



“Maromak nia sasán”, ita hakarak la husik tempu liu de’it, mai fó valór ba tempu hodi hanoin, hanesan madre Mazzarello no Dom Bosco repete beibeik katak tempu liu lalais no Maromak sei tesi lia ba ita konforme oinsá ita gasta tempu ida ne’e?

- ✓ Bibi atan sira fila ba uma hodi hahi’i, hawelok Na’i, iha ita-nia sosiedade, nei-neik ita-nia fiar sai buat ruma “pesoál”: ema hahú atu la ba Missa domingu, bainhira tenke fó sasin kona-ba fiar ita moe, dala ruma ita-nia moris la’o dook husi buat ne’ebé ita fiar ho ibun. Saida mak ita bele halo atu ita-nia moris bele sai sasin ne’ebé “dere” ema seluk nia moris no sadik sira atu hatán ba Maromak?

ANJU sira

Buat ne’ebé anju sira haklaken, kontinua habelar iha mundu tomak, liuhusi Maromak nia manu-ain sira ne’ebé ho aten-barani dada ema seluk ba Maromak: “Glória ba Maromak no damen ba ema sira ne’ebé Na’i hadomi”. Glória la’ós buat ruma ne’ebé ita, nu’udar ema, bele inventa, Maromak rasik fó glória ba Ninia naran, no ita presiza rekoñese lialoos ida ne’e. Maibé anju temi mós ema sira ne’ebé Na’i hadomi, hodi fó hanoin ba bibi atan sira katak Maromak la halo diferénsia entre ema sira: ema hotu mak importante ba Nia, Nia haruka Ninia Oan mane mesak atu soi ema hotu. Maibé ema sira bele rekoñese realidade ida ne’e, bele fó ksolok ba Maromak ho sira-nia hahalok, hanesan Jezús, ka bele hadook an husi Nia. Akontesimentu Natál nian fó hanoin ba ema nia liberdade: hanesan anju sira dehan, Maksoin (ba hotu-hotu) moris ona, maibé ema ida-idak sei hakotu se hamriik ba hasoru Nia ka hakribiit Nia.

- ✓ Ita sente katak iha akontesimentu ida-idak iha Maromak nia mensajen? Ita hatán oinsá ba Nia? S. Ireneu hakerek katak “Maromak nia glória mak ema ne’ebé moris”: ita konxiente kona-ba ita-nia responsabilidade? Ita-nia moris mak haklaken ida ba ema ne’ebé hasoru ita?
- ✓ Iha ninia Evanjellu, s. João haktuir katak “*ba ema sira ne’ebé simu Nia hodi fiar nia naran, Nia haraik kbiit atu sai Maromak nia oan*”. Nu’udar Nia oan sira, Maromak hadomi ita, hanoin ba ita, simu ita no hein ita atu loke ita-nia moris ba ksolok ne’ebé mai husi ninia domin. Bainhira ita rona Maromak nia Liafuan sira, Maromak nia lia menon, ita simu kbiit atu sai Maromak nia oan sira, ne’ebé Nia akompaña to’o iis ikus nian. Oinsá ita bele hamoris ita-nia relasaun ho Maromak atu bele hatudu katak ita mak Ninia oan sira?

Durante tempu konfessa nian, bele husu ba foin-sa’e sira atu reflète kona-ba aspetu sira ne’e, no mós sira bele lee Jo 1,9-14, hodi husu ba sira-nia an oinsá sira bele sai Maromak nia oan sira hamutuk ho Jezús.

Bele taka retiru ida ne’e ho orasaun ne’ebé tuir mai:

*Obrigado Na’i, ba bengan ne’ebé ha’u simu ohin no ba bengan hotu
ne’ebé Ita haraik mai ha’u no ha’u la hatene haree.*

*Obrigado Na’i, ba tempu ne’ebé liu ona, ba projetu sira ne’ebé ha’u bele
realiza no*

ba buat ne’ebé ha’u la biban atu ba to’o rohan.

*Obrigado Na’i, ba tempu ohin loron nian,
ba roman no nakukun ne’ebé ha’u hetan iha mundu ne’e no iha ha’u-nia
laran.*

*Obrigado Na’i ba futuru, ne’ebé seidauk mosu,
maibé ha’u fiar katak Ita sei haraik mai ha’u buat ne’ebé loos ba ha’u.
Na’i, hamoris nafatin roman esperansa nian iha ha’u laran, hakle’an ha’u-
nia fiar nia abut sira,*

*treinu ha’u atu hamnasa midar no fó sasin katak ho Natál,
Ita hatudu Ita-nia domin no Ita-nia kbiit ne’ebé sei troka mundu.*